

校正經餘必讀

經餘必讀三編卷下

三山趙在翰纂

永康胡鳳丹月樵校梓

尙書逸篇

隋志尙書逸篇二卷
孔壁中書之殘缺者

商書

湯征

孔安國曰爲夏
方伯得專征伐

湯曰予有言人視水見形視民知治不伊尹曰明哉言能聽道乃進君國子民爲善者皆在王官勉哉勉

哉湯曰汝

謂諸侯

不能敬命予大罰殛無有攸赦

景亳之命

篇名見
左傳

維三月王自至於東郊告諸侯羣后毋不有功於民勸力酒事予乃大罰殛汝毋予怨曰古禹皐陶久勞於外其有功於民民有乃安東爲江北爲濟西爲河南爲淮四瀆已修萬民乃有居后稷降播農殖百穀三公咸有功于民故后有立昔蚩尤與其大夫作亂百姓帝乃弗予有狀先王言不可不勉曰不道母之在國汝毋我怨以令諸侯

湯祝

尙書古義篇
名依墨子

湯克夏而正天下旱五年不收湯乃以身禱于桑林祝曰惟予小子履敢用玄牡敢昭告于皇皇后帝今天大旱卽當朕躬履未知得罪于上下有善不敢蔽有罪不敢赦簡在帝心朕躬有罪無以萬方萬方有罪罪在朕躬以六事自責曰政不節與使民疾與宮室崇興女謁盛與苞苴行與讒夫昌與無以予一人之不敏使上帝鬼神傷民之命

洪範

案左傳引此篇文注商書

食曰生貨曰節祀曰敬司空曰時司徒曰德司寇曰慎賓曰禮師曰律生乃蕃節乃裕敬乃格時乃悅德乃化慎乃仁禮乃嘉律乃有功

孫氏承澤曰朝鮮本八曰師下有此五十二字箕子傳

孔子三朝記

漢藝文志孔子三朝七篇注孔子對魯公語也秦密曰孔子三見哀公言成七卷

千乘第一

哀公問曰千乘之國爲仁如何孔子對曰不仁國不化仁者不淫於色孔子曰立妃設如太廟然乃中治不相陵不相陵斯庶孀違

違與章同明辨也

庶孀違則事上靜立子設如宗社宗社先示威威明顯辨爵集

德是以母弟官子咸有臣志莫敢援于外大夫中婦私謁不行此所以使五官治執事政也夫政以教百姓百姓齊以嘉善盡佞不生立卿設如大門大門顯美小大尊卑中度開明閉幽內祿出災以順天道國

有四輔輔卿也卿設如四體設其四佐而官之司徒司春以教民之不則時不若不令成長幼老疾孤寡以時通于四擗凡民之藏貯以及山川之神明加於民者發齊戒必敬會時必節日歷巫祝執伎以守官俟命而作祈王年禱民命方春三月緩施生育動作百物於時有事享於祖考朝孤子八人以成春事司馬司夏以教士車甲凡士執伎論功修四衛強股肱質射御治衆長卒所以爲儀綴於國出可以爲率誘於軍旅方夏三月養長秀蕃庶物于時有事享于祖考爵士之有慶者七人以成夏事司寇司秋以聽獄訟治民之煩亂執權變民中方秋三月收斂以時於時有事嘗于祖考食農夫九人以成秋事司空司冬以制度制地事準揆山林規表衍沃畜水灌浸以節四時之事治地遠近以任民力以節民食食壯之食攻老之事古無游民食節事時民各安其居服事上下交信方冬三月草木落庶虞藏五穀必入於倉於時有事烝於祖考息國老六人以成冬事民咸知孤寡之必不失也咸知有大功之必進等也咸知用勞力之必以時息也推而內諸水火弗之顧矣公曰善

四代第二

哀公問曰四代之政刑論其明者可以爲法乎孔子對曰夫規矩準繩鈞衡先王所以爲天下也小以及大近以知遠水火金木土穀此謂六府民並用之今日行之可以知古可以察今詩云東有啟明於時雞

三號以興庶虞庶虞動蜚征作嗇民執功百草咸淳天子盛服朝日于東堂以教敬於天下也是以祭祀昭有神明燕食昭有慈愛宗廟之事昭有義率禮朝廷昭有五官無廢甲冑之戒昭果毅以聽天子曰崩諸侯曰薨大夫曰卒士曰不祿庶人曰死昭哀哀愛無失節是以父慈子孝兄愛弟敬此先王所施於民也君而後此則爲國失本矣○公問圖德何尙孔子曰知仁之實也仁信之器也信義之重也義利之本也委利生孽公曰道天地以民輔之聖人何尙孔子曰有天德有地德有人德三德率行乃有陰陽陽曰德陰曰刑公曰陽德何出孔子曰陽德出禮禮出刑刑出慮慮則節事於近而揚聲於遠公曰善哉○公曰民與天地相參者何也孔子曰天道以視地道以履人道以稽廢一曰失統○公曰請問民徵孔子曰爲父不慈爲子不孝縱耳目好色失志好見小利變從無節燒弱不立鬼神過節妨於政克勿與比依勿與謀放勿與遊微勿與事臣聞之弗慶非事君也君聞之勿用以亂厥德

虞戴德第三

哀公問曰昔有虞戴德何以深慮高舉孔子曰聖人之教民也率天而祖地能用民德是以高舉不過天深慮不過地質知而好仁能用民力此三常之禮明而名不蹇禮失則壞名失則昏是故上古不諱正天名也天子之宮四通正地事也天子御諸璫侯御荼大失服笏正民德也斂此三者而一舉之戴天履地

以順民事天子告朔於諸侯率天道而散行之天下之有道也有天子存國之有道也君得其正家之不亂也有仁父存故聖人之教民也以其近而見者稽其遠而明者○孔子曰昔商老彭及仲傀政之教大矣官之教士技之教庶人揚則抑抑則揚綴以德行不任以言○公問政孔子曰黃帝之制制之大禮也昭天之福迎之以祥作地之福制之以昌興民之德守之以長公曰善哉

誥志第四

哀公問曰誥志無荒以會民義會時必節犧牲必全齊盛必潔上下禋祀外內無失節其可省怨遠災乎

孔子曰臣未知其可也公曰然則何以孔子曰知仁合則天地成天地成則庶物時節事以動衆動衆則

有極有極以使民則勸勸則有功而無怨是故政以勝衆非以陵衆衆以勝事非以傷事事以靖民非以

徵民故地廣而民衆也臣聞虞史伯夷曰明孟也幽幼也迭興而順至正之統也日歸於西起明於東月

歸於東起明於西虞夏之歷正建於孟春於時冰泮發蟄百草權輿瑞雉先澤二句從史記物乃歲俱生於東

以順四時卒於丑日月成歲歷再閏以順天道天曰作明曰與惟天是戴地曰作昌曰與惟地是事人曰

作樂曰與惟民是嬉天生物地養物物備與而時用常節曰聖人天作仁地作富人作治樂治不倦財富

時節是故聖人嗣則治文王治以俟時湯治以伐亂禹治以移衆衆服以立天下堯貴以樂治時舉舜舜

治以德古之治天下者必聖人聖人有國則日月不食星辰不隕河不滿溢川澤不竭山不崩解陵不施谷於時龍至不閉鳳降忘翼驚獸忘攫爪鳥忘距維出服河出圖自上世以來莫不降仁國家之昌國家之滅信仁是故不賞不罰如民咸盡力車不建戈遠邇咸服地寶畢極無怨無惡率惟懿德

小辨第五

哀公問曰寡人欲學小辨以觀於政其可乎孔子曰不可社稷之主愛日昔者先王學大道以觀於政天子學樂辨風制禮以行政諸侯學禮辨官政以行事以尊事天子大夫學德別義矜行以事君士學順辨言以遂志庶人聽長辨禁農以行力小辨破言小道破義小義破道小道不通通道必簡是故循弦以觀於樂足以辨風矣爾雅以觀於古足以辨言矣傳言以象反舌皆至可謂簡矣夫道不簡則不行不行則不樂辨言之樂不若治政之樂辨言之樂不下席治政之樂皇於四海夫政善則民悅民悅則歸之如流水親之如父母公曰然則何學而可孔子曰禮樂而力忠信公曰請學忠信之備孔子曰臣也綴學安知忠信臣聞忠有九知知忠必知中知中必知恕內思畢心曰知中中以應實曰知恕內恕外度圖知外外內參意曰知德德以柔政曰知政正義辨方曰知官官治物則曰知事事戒不虞曰知備毋患曰樂樂盡

曰終

用兵第六

哀公問曰用兵者其由不祥乎孔子曰胡爲其不祥也聖人之用兵也以禁殘止暴於天下也後世用兵以刈百姓危國家也聖人利用而弭之亂人興之喪厥身詩云魚在在藻厥志在餌聖人愛百姓而憂海內故今之道堯舜禹湯文武者猶思其德必稱其人夏桀商紂羸暴於天下殺戮無罪殃傷其身夫天之報殃於無德者必與其民公懼焉曰爲民上者可無懼乎哉

少閒第七

哀公問曰日少閒請言情於子上下咸通權其輕重準民之色目既見之鼓民之聲耳既聞之動民之德心既和之通民之欲兼而壹之親賢而教不能民庶說乎孔子曰說矣可以爲家不可以爲國公曰國之民家之民也孔子曰其名異同名曰同等惟不同等民以知極故天子昭有神於天地之間以示威於天下也諸侯修禮於封內以事天子大夫修官守職以事其君士修四術執伎論力以聽乎大夫庶人仰觀天文俯視地理力時使以聽乎父母唯不同等民可治也○孔子曰堯取人以狀舜取人以色禹取人以言湯取人以聲文王取人以度此四代五王之取人以治天下如此虞舜以天德嗣堯布功散德制禮民明教通于四海北發肅慎朔方幽都來服南撫交趾西渠析支出入日月莫不率俾西王母來獻其白琯

粒食之民昭然明視禹代興舜命乃遷姚姓於陳作物配天脩德使力明教通於四海成湯受天命發厥明德順天嚮地作物配天制典慈民咸合諸侯作八政命於總章服禹功以修舜緒爲副於天二十有二世乃有武丁在位開先祖之府取其明法以爲君臣上下之節近者悅遠者至文王受天命作物配天親尙賢明教通於四海海外肅慎北發渠搜氏羌來服君其志焉公曰失政者夏桀商紂之謂乎孔子曰否若夏商者天奪之魄不生德焉憂以繼懼政出家門此之謂失政懣忍也言天下安然方憂繼之出其忍政也

逸論語

漢書藝文志曰齊論語二十二篇有問王知道多魯論二篇王伯厚曰問王卽問玉說文嘗引逸論語云周永年濟甯志孔子弟子任子有逸於語二篇其門人齊東門子高蒯伯儀所傳者

卽此書也

問玉

凡六十章

子貢問曰君子貴玉而賤珉何也孔子曰君子比德於玉焉溫潤而澤仁也縝密而栗智也廉而不劌義也粲之璵兮其環剛也

此八字家語佚說文引逸論語有之剛作猛

垂之如墜禮也叩之其聲清越而長其終則詘然樂也瑕

不掩瑜瑜不掩瑕忠也孚尹旁達信也氣如白虹天也精神見于山川地也圭璋特達德也天下莫不貴

者道也詩云言念君子溫其如玉

如玉之瑩

故君子貴之○孔子曰美哉璫璵達而望之奘若也近而視之瑟

若也一則理勝一則爭勝○孔子曰學必由聖所以致其材也○孔子曰君子有三愛弗知可無愛與知

而弗學可無憂與學而弗行可無憂與○孔子曰心之精神是爲聖○孔子曰尊其所聞則高明矣行其所知則光大矣○孔子曰如埶而進吾與之如止吾已矣○孔子曰已少而好學晚而聞道此以博矣○孔子曰不學而好思雖知不廣矣學而慢其身雖學不尊矣不以誠立雖立不久矣誠未著而好言雖言不信矣○子夏曰日習則學不忘自勉則身不墮亟聞天下之大言則志益廣○孔子謂顏淵曰人莫不知此道之美而莫之爲也何居爲聞者盍曰思也夫○孔子曰可以與人終日而不倦者其惟學乎○孔子曰弗學何以行弗思何以得小子勉之○孔子曰書之重辭之復嗚呼不可不察其中必有美者焉○齊景公問於晏子曰爲政何患晏子對曰患善惡之不分也審擇左右則百僚各得而善惡分孔子聞之曰是言也信矣善進則不善無由入矣不善進則善無由入矣○孔子曰民有小罪必以其善以赦其過如死使之生其善也是以上下親而不離○孔子曰簫韶者舜之遺音也溫潤以和似南風之至○宰我問曰君子尙辭乎孔子曰君子以理爲尙博而不要非所察也繁辭富說非所聽也惟知者不失理○孔子曰君子不舉人以質事○孔子曰惟君子能貴其言貴其色小人能乎哉○孔子曰知不可由所知所由矣○孔子曰至信可以感物○顏淵謂子路曰力猛於德而得其死者鮮矣盍慎焉○孔子曰不慎其前而悔其後雖悔無及矣○孔子曰由志之奮於言者華奮於行者伐色智而有能者小人也故君

子知之曰知之不知曰不知言之要也能之曰能之不能曰不能行之要也言要則智行至則仁既智且仁夫惡有不足者哉○孔子曰無類之說不形之行君子慎之○孔子曰語有之言發於邇不可止於遠也行出於身不可掩於衆也○孔子曰終日言不遺己之憂終日行不遺己之患惟智者有之故恐懼所以除患也恭敬所以越難也終身爲之一言敗之可不慎乎○孔子曰欲人之信己也則微言而篤行之○閔子騫問孝孔子曰敬順爲本意以承之順承顏色無所不至發一言舉一意不敢忘父母營一手措一足不敢忘父母雖居獨室之中亦不敢懈其誠此之謂全孝○孔子曰操則存舍則亡出入無時莫知其鄉惟心之謂與○曾子曰往而不可還者親也至而不可加者年也是故孝子欲養而親不待也椎牛而祭不如雞豚之逮親存也○子貢問於孔子曰夫子聖矣乎孔子曰聖則吾不能學不厭而教不倦也子貢曰學不厭智也教不倦仁也仁且智夫子既聖矣道論任子曰學所以治己教所以治人不勤學無以爲知不勤教無以爲仁○顏淵曰舜何人也予何人也有爲者亦若是○孔子之楚有孺子歌曰滄浪之水清兮可以濯我纓滄浪之水濁兮可以濯我足孔子曰小子聽之清斯濯纓濁斯濯足矣自取之也○舜行德三年而三苗服孔子曰通乎德之情則孟門太行不爲險矣故曰德之流行速於置郵而傳命○季孫問百世之宗有絕道乎孔子曰繫之以姓義無絕也○孔蔑問行己之道孔子曰知而弗爲莫如弗知親而弗信莫如弗親樂之方

至樂而弗驕患之方至思而勿憂蔑曰行己已乎孔子曰攻其所不能修其所不足毋以其所不能疑人毋以其所能驕人孔子謂子路曰見長者而不盡其辭雖有風雨吾不能入其門矣○曾子曰或言子之善子惟恐其聞或言子之不善惟恐過而見子之鄙色焉○顏淵問何以爲身子曰恭敬忠信而已矣恭則免於患敬則人愛之忠則人與之信則人任之可以正國豈特一身哉○仲孫何忌問於顏淵曰一言而有益於仁智可得聞乎顏淵曰一言而有益於智莫如豫一言而有益於仁莫如恕○孔子謂子貢曰禮以修外樂以制內已矣夫○孔子曰心不得義不能樂身不得利不能安○孔子曰事無終始無務多業聞記不善無務多言比近不說無務求遠是以反本修邇君子之道也○孔子曰言之善者在所日聞行之善者在所能爲曾子曰夫子見人一善而忘其百非是夫子之易事也夫子見人有善若己有之是夫子之不爭也夫子聞善若躬行之然後道之是夫子之能勞也吾學夫子而未能行也○孔子曰聽訟雖得其情必哀矜之死者不可復生斷者不可復續也書曰哀矜折獄○齊景公致廩邱於孔子以爲養孔子不受出謂弟子曰吾聞君子當功以受祿今言未行而賜之廩邱其不知已甚矣遂行○曾子衣敝衣以耕魯君使人往致邑焉曾子不受曰吾聞之受人者畏人予人者驕人縱君有賜不我驕也我能勿畏乎孔子聞之曰參之言足以全其節也○孔子曰進見而不以能往者非賢也○子貢相於衛嘗結

駟連騎以造原憲憲衣敝衣冠并日疏食衛然有自得之志子貢曰甚矣子病也憲曰吾聞無財者謂之貧學道不能行者謂之病吾貧也非病也子貢終身恥其言之過○顏籬由善事親子路義之後籬由以非罪執子路請以金贖焉二三子納之或問曰受人之金以贖其私義乎孔子曰義而贖之貧取於友非義而何○孔子曰其君以譽爲賞以毀爲罰賢者不居焉○曾子曰入是國也言信乎羣臣則留可也忠行乎羣臣則仕可也澤施乎百姓則安可也○孔子曰居而得賢友福之次也○孔子曰入而行不修身之罪也出而名不章友之過也故君子入則篤行出則友賢○孔子曰今之聽民者求所以殺之古之聽民者求所以生之不得其生之道乃刑殺君與臣會焉○顏淵問友孔子曰君子之於友也心有非焉而弗能謂吾不知其仁也不忘久德不思久怨仁矣夫孔子曰與交者推其長違其短故能久矣○孔子曰審吾所以適人適人之所以來我也○孔子曰君子能仁於人不能使人仁於我能義於人不能使人義於我○孔子曰君之於人也計功而除過○孔子曰君子以其所不能畏人小人以其所不能信人故君子長人之才小人抑人而取勝焉○孔子曰君子有不幸而無幸小人有幸而無不幸○孔子曰移風易俗豈家至之哉先之於身而已○孔子曰明王有三懼處尊而恐不聞過得志而恐驕聞天下之至言而恐不能行○孔子曰湯武非一善而王也桀紂非一過而忘也○孔子曰六藝於治一也禮以節人樂

以發和書以道事詩以達意易以神化春秋以道義○孔子自衛反魯幽谷之中見香蘭獨秀喟然歎曰夫蘭當爲王者香今乃與衆草伍乃止車援琴而鼓猗蘭之操○孔子曰大節是也小節是也上君也大節是也小節一出焉一入焉中君也大節非也小節雖是焉吾無觀其餘矣○孔子曰昔者舜左禹而右皋陶不下席而天下治○曾子問曰立嫡以長不以賢何也孔子曰以言爲賢不肯一不可知也○定公問曰書云維高宗報上甲微何謂也孔子曰親盡廟毀有功不及祖有德不及宗故於每歲之大嘗而報祭焉所以昭其功德也○季桓子問曰書云茲予大享于先王爾祖其從與享之何謂也孔子曰古之王者臣有大功死則祀之於廟所以勸忠勤也盤庚舉其事以厲其世臣故稱焉桓子曰諸侯之臣有大功者可乎孔子曰勞能定國功加於民大臣死難食之公廟可也桓子曰其位如何孔子曰生則有列於廟死則有位於廟其序一也○孔子曰堯舜之化百世不輟仁義之風遠也管仲任法身死則法息嚴而寡恩也若管仲之知足以定法非管仲而專任法終必亂成矣○子貢曰慮不豫不可以應卒兵不豫不可以勝敵○孔子曰惡人者人惡之知得之己者亦知得之人所謂不出環堵而知天下者知及之己者也○孔子曰誦詩讀書與古人居讀書誦詩與古人稽

詩曰天生烝民有物有則民之秉彜好是懿德孔子曰爲此詩者其知道乎故有物必有則民之秉彜也故好是懿德○詩曰迨天之未陰雨徹彼桑土綢繆牖戶今此下民或敢侮予孔子曰爲此詩者其知道乎能治其國家誰敢侮之○孔子曰不通於論者難與言治○孔子曰詩者持也在乎敦厚之教自持其心諷刺之道可以扶持邦家者也○孔子讀詩及小雅喟然歎曰吾於周南召南見周道之所以盛也於柏舟見匹婦執志之不可易也於淇澳見學之可以爲君子也於考槃見遯世之士而不悶也於木瓜見苞苴之禮行也於緇衣見好賢之心至也於雞鳴見古之君子不忘其敬也於伐檀見賢者之先事後食也於蟋蟀見陶唐儉德之大也於下泉見亂世之思明君也於七月見幽公之所造周也於東山見周公之先公而後私也於狼跋見周公之遠志所以爲聖也於鹿鳴見君臣之有禮也於彤弓見有功之必報也於羔羊見善政之有應也於節南山見忠臣之憂世也於蓼莪見孝子之思養也於四月見孝子之思祭也於裳裳者華見古之賢者世保其祿也於采芣見古之明王所以敬諸侯也○孔子曰吾道不行矣吾何以自見於後世哉乃因史記作春秋曰吾因行事而加乎王心焉以正人倫以明順逆○魯有儉者瓦鬲煮食自謂其美以進孔子孔子受之子路曰瓦鬲陋器也煮食薄膳也子何厚焉孔子曰夫好諫者思其君貪美者念其親吾非以饌具爲厚以其食厚而我思也○子貢曰出言陳詞身之得失國之安危

也詩云辭之懌矣民之莫矣○子路曰人臣之節當君大事惟力所及死而後已季文子相魯妻不衣帛馬不食粟孔子曰太儉極下此蟋蟀所爲作也○季氏之權三桓之富也孔子曰微爲人臣權均於君富侔於國者亡○孔子曰靈公汙而晏子事之以潔莊公怙而晏子事之以勇景公侈而晏子事之以儉君子也○孔子曰善爲吏者樹德不善爲者樹怨槩者平量者也吏者平法者也治國者不可失平也○孔子曰古之知法者能省刑本今之知法者不失有罪末矣○孔子曰臨之無抗民之志勝之無犯民之言量之無移民之辭養之無擾於時愛之勿寬於刑而民自得也○孔子曰鞭扑之子不從父之教刑戮之民不從君之令言疾之難行也故孔子不急斷不意使以爲亂源○孔子如衛人曰公甫不能聽獄孔子曰非公甫不能聽獄也有罪者懼無罪者恥民近禮矣○子貢曰傳云堯舜之世一人不刑而天下治教誠而愛深也○臧孫行猛政子貢曰夫政猶張琴瑟也大弦急則小弦絕矣故罰得則姦邪止賞得則下歡悅○宓子賤治單父鳴琴身不下堂而單父治巫馬期治單父以星出以星入日夜不處以身親之而單父亦治期問子賤曰吾任人子任力任力者勞任人者佚○子貢曰夫子之道甚大也故天下莫能容盍少貶焉孔子曰賜夏農能稼而不能爲穡良工能巧而不能爲順君子能修其道綱而紀之統而理之而不能爲容今不修爾道而求爲容賜志不遠矣○孔子曰古之刑者省之今之刑者繁之古之有禮然

後有刑是以省也。今者反是無禮而齊之以刑是以繁也。○子貢爲信陽宰將行孔子曰慎之治官莫如平臨財莫如廉廉平之守不可改也。○孔子讀易至損益喟然嘆曰或欲利之適足以害之或欲害之適足以利之利害之反禍福之門不可不察也。○孔子曰父母之道天地也乾爲父坤爲母。○孔子曰吾於高宗彤日見不修德而報之疾也苟由其道致其仁則遠方歸德焉。○子路治蒲見孔子孔子曰蒧以敬可以懾勇寬以正可以容衆蒧正以潔可以親上。○孔子曰昔周公之事文王也行無博制事無繇己身若不勝衣言若不出口有奉持於前洞洞屬屬如將不勝如恐失之可謂能子矣。○孔子曰回有君子之道四焉強於行己弱於受諫愴於待祿慎於持身。○孔子曰語云相馬以輿相士以居弗可廢矣以容取人失之子羽以言取人失之宰予。○孔子曰文王得四臣丘亦得四友焉吾得回也門人加親是非疏附乎吾得賜也遠方之士至是非奔奏乎吾得師也前有光後有輝是非先後乎吾得由也惡言不入於耳是非禦侮乎。○孔子曰管仲之爲人也力功不力義力知不力仁。○孔子曰子產於民爲惠主於學爲博物晏子於君爲忠臣於行爲敬敏吾皆以兄事之。○孔子曰史鱣有君子之道三不仕而敬上不祀而敬鬼直能曲於人。○孔子曰商也日益賜也日損商也好與賢己者處賜也悅不若己者。○孔子曰國有道雖加刑也無刑國無道雖殺之不可勝也。○曾子曰君子之於子也愛而勿面也使而勿貌也導之以道